



حزب الكنبه ده مكانش موجود قبل الثورة، وأنا مش عارفة مين اللي اخترع الكلمة دي بس هو طبعاً المصريين كلهم دمهم خفيف.

وقت لما حصل الثورة والناس كل حد خد موقف، هي الناس اللي مخدتش أي موقف. كله اتفرج على التلفزيون على الكنبه، ومعملتش أي حاجة.

أول مرة سمعتها كان وأنا هناك، كان في حد بيسجل مع التلفزيون في الميدان، سمعت حد وقال الكلمة دي. الأول مفهمتهاش وبعدين هو شرحها. وأثرت فيا أوي لأن أنا بعد كده شوفت ناس كتير... شوفت ناس كتير قاعدة.

الناس اللي مبتتحركش عشان أي حاجة، هي قاعدة وبتقول: «أنا مليش دعوة».

الناس اللي هي مهباش رأي أوي، وبتفضل الاستقرار.

لو اتكلمنا على الدستور «نعم». نعم للدستور عشان الاستقرار. الانتخابات: شخص معين عشان الاستقرار. عشان الاستقرار... عشان الاستقرار... ده كل هدفهم هو الاستقرار.

ناس يريدون السلام: لا أكثر ولا أقل. مهمش يعني في مثلاً يكون هناك رئيس معين أو وزير معين.

هو مفيش حاجة مثلاً تتقال عليه وهو يكون عنده رأي واضح فيه. فهو لازم يكون قاعد في البيت بقى، جه فلان هو مبسوط بيه، جه فلان تاني هو مبسوط بيه. أهم حاجة إن الحياة تمشي والناس تاكل عيش.

حزب الكنبه المفروض يفضل قاعد، مبيتحركش، مبيقولش رأييه، هو عايش والسلام، ياكل ويشرب وينام. أنا بسميها زي الحيوانات.

هما ناس ملهمش أي دور إيجابي في الحياة.

أكيد الشباب أو الناس اللي كانوا مشاركين في المظاهرات في الميدان كانوا زعلانين من الناس اللي مبتنزلش، فقالوا عليهم «حزب الكنبه».

الإعلام هو اللي قالها.

أنا فاكدة إنها طلعت كان وقت اللي في التمنتاشر يوم، لما حصل مثلاً خطاب مبارك اللي هو كان يوم واحد فبراير بالليل... لما قال إن هو هيسيب الحكم بعد ستة شهور. بيتتهالي ده بقى كان جزء كبير من الناس اللي هي قالت «طب ما تدولوه فرصة». فبيتتهالي الناس كانت بتتكلم عن حزب الكنبه.

أصبح بيدل على مجموعة الناس أو المواطنين متوسطي وكبار السن الذين لم ينزلوا الشارع ولم يشتركوا في المظاهرات، وكتفوا بالجلوس على الكنبه ومتابعة التلفزيون.

كانت يعني إيه... بتضايق الناس.

أنا فاهمة فكرة إنه حد يبقى بيخاف من التغيير. وبالذات إن ساعة ما طلعت فكرة الثورة، الموضوع كان راديكال يعني. التغيير كان شديد فجأة، إن الناس بتتكلم على... على إسقاط نظام. وفجأة مفيش بوليس في الشارع، وفجأة في بلطجية، وفجأة في حاجات كده. بحس إن هما الخوف مسيطر عليهم لدرجة إن هما قابلين بأي وضع، مهما كان اللي بيحصل يعني.

أغلبهم بيبقى الناس الكبيرة اللي هما العواجين الناس اللي خلاص كبرت، وهي أصلاً متعوده طول عمرها تمشي جنب الحيط. مينفعش تقول رأيها: «إمشي جنب الحيط يا بني عشان تكمل طريقك وميحصلكش حاجة وتبقى في أمان وكويس».

سبعين مليون في الشعب المصري ده حزب كنبه. وعابز أقولك إنه المفروض ميطلقش عليهم حزب الكنبه. هما معندهممش اختيار ثاني: حياتهم هي اللي غصباهم على كده. واحد بيقوم الصبح أول حاجة بتتطلب منه عايزين فطار للعيال، عايزين فطار لمراتي، مش عارف إيه. بيدور على أكل عيشه، وفي آخر اليوم بيبقى راجع ينام من غير عشا، ومعرفش برضه يجيب الأكل دوت.

هما الحزب الكنبه اللي هو مثلاً كان بيفتح السوبر ماركت الصبح، فماشركش في الثورة. هو واقف في محله... لقمة عيشه. فإنت اللي روجت اشتريت من عنده، هو شاف مصلحته في هذا. لو كله شارك في الثورة، كان مفيش محلات هتتفتح: كله مقفول، كله معتصم.

هو مستعد يتدل عشان لقمة العيش. وفي الآخر، برضه مش هيلاقى لقمة العيش.

أنا كنت من حزب الكنبه، مكنتش بشارك في أي تفاعل ديمقراطي، بس مش... مش... مش إن أنا مش عايز أشارك. أنا هنزل أجهد نفسي، وهتعب نفسي على إيه؟ ما هي العملية متظبطة متظبطة. مفيش فائدة، على رأي سعد زغلول.

أنا من أحد أفراد حزب الكنبه الجميل. أنا مقدرش أقول على نفسي إن أنا شاركت في الأحداث بشكل أو بآخر. نزلت يوم التنحي بس كده. وغير كده مكنتش بنزل في أي فعاليات بالدرجة. مش هقولك إن أنا معنديش الحماسة الثورية أو معنديش الفكر اللي بيتميز بيه الناس اللي كده، بس هي الفكرة إن أنا معرفش... يمكن أنا مهتمية بقضايا ثاني غير التحرير والناس، يمكن فيها شيء من الأناية أكثر من أي حاجة ثاني. بس أنا على الأقل بعترف بذلك.

أنا واحدة من الناس مبحبش الأحزاب السياسية: بحب بيبقى لي فكري لوحدي يعني. فلما تكلمني عن

السياسة، اتكلم أنا لوحدي، من غير ما تقولي: «إنتي تبع حزب إيه؟» لأ أنا رأيي السياسي بيقول كذا كذا كذا. لكن حزب الكنبه ده، يعني معناها إن أنا قاعدة ساكتة، بيشتمونني كده، فاهمة إزاي؟ الشتيمة... سلبية بمعنى، فاهمة.

أنا في الأول كنت واحدة منهم، لغاية لما شوفت ناس بتموت قدامي في التلفزيون فتحركت. أول الثورة كنت واحد من ضمن حزب الكنبه دول، إن أنا كنت دايمًا كل حاجتي باخدها من النت. مكنتش بنزل. ويمكن لإن كمان أسوان مكانش فيها مظاهرات زي مصر بعد الثورة، وبعد اللي هو كان حكم المجلس العسكري أيامها وكده، وكانت بتطلع برضه مظاهرات هنا، في الفترة دي أنا بقى بقيت بطلع هنا مظاهرات، سواء لوحدي أو مع أصحابي. بقيت انزل معاهم وأهتف معاهم، وكنت بحس باحساس مختلف، اللي هو إنت حد مشارك في العملية دي.

بعد الثورة طبعًا نزلنا وشاركنا، وكنا بنبقى سعداء بده، لإن حسينا في الوقت ده، خلال التلت سنين، إن احنا يعني لو اتكلما هيبقى صوتنا ليه قيمة.

الحقيقة حزب الكنبه ده أثبت إن هو أكثر تأثيرًا من الناس اللي في الشارع، لأنه في النهاية نزل للانتخابات.

طب اللي نجح مين؟ نجح حد من بتوع الثورة؟ حد نجح في الانتخابات مجلس الشعب اللي اتعملت في ٢٠١٢؟ محدش نجح! مفيه مش واحد من الثورة! ومفيه مش واحد شباب! اللي نجح معظم التيارات الإسلامية واللي الإخوان وغيره وغيره... وده خلت ناس، المحترمين بقى، اللي في الحزب الوطني، اللي شايفين الصورة مش حلوة، يروحوا قاعدين... أنا واحد منهم يعني... قاعدين على الكنبه. ويطلق لفظ إعلامي عليه «حزب الكنبه».

حزب الكنبه مختلف عن الفلول خالص. لأ الفلول دول إتجاهات حزبية وكانت مشاركة في المجتمع. لكن حزب الكنبه مش بيشترك أصلاً. معندهم مبادئ أصلاً، لأ أو معندوش وعي.

حزب الكنبه للأسف متأثر بما يمليه عليه الإعلام. يعني: الإعلام هو المغذي الرئيسي لعقول حزب الكنبه. والتليفزيون بيقول حاجات متناقضة، تسمعي التليفزيون المصري والجزيرة في حاجات غريبة: ده غير ده، ده غير ده تمامًا. فمبتقيش فاهمة غير لما بتنزلي المكان نفسه وتشوفيه، تطلعي من حزب الكنبه. طالما أنا قاعد في بيتي ومطمئن، وناس بتموت بره، ناس بتجوع بره، أنا مودي البلد في داهية.

في النهاية اتضح إن حزب الكنبه هو الصوت الأعلى، وهو اللي حدد مصير مصر. الحاجة المؤثرة إنه حزب الكنبه كان ليه عدد كبير جدًا، يعني عدد يفوق أعداد الناس اللي كانت موجودة في الثورة. إذا كان نزل في أي ظرف من الظروف، كان هيكون ليه دور مؤثر جدًا.

لما جه يطردهوا الإخوان في ٣٠ يونيو، الناس اللي في حزب الكنبه نزلوا. حطوا الكنبه في الشارع... لو شوفتيها في التليفزيون... فقالوا: «احنا بقى حزب الكنبه اللي كنا قاعدين ساكتين، نزلنا وقعدنا في الشارع وبتتكلّم!» وكانت صورة جميلة جدًا يعني.

حزب الكنبه نزل في ٣٠ يونيو، كله... ومبقاش حزب الكنبه: الثورية هما اللي قعدوا على الكنبه.

أنا دلوقتي، بيني وبينك، أنا برضه منهم. يعني أنا مش هقولك أنا حزب كنبه، بس أنا بقيت من حزب الكنبه... من يأسى. أنا نزلت مظاهرات لمدة سنة، وأنضرب عليا قنابل غاز وحسيت بشوية أمل، بس الحمد لله الأوضاع في مصر ضربت الأمل ده بالجزمة. مات. خلاص.